

TEZAU LITURGIC
18 SEPTEMBRIE

ACATISTUL
SF. CUVIOASE
EUFROSINA
DE LA SUZDAL



MOSCOVA, 2000



Акафист
святой благоверной княжне
преподобной Евфросинии
Суздальской

Кондак 1

Избранная от чрева матерня, угоднице Христова княжна Евфросиние, прославляюще прославльшаго тя Христа Господа, хвалебная приносим ти песни, мати преподобная; ты же, яко имущая дерзновение ко Господу, от всяких нас бед свободи, да зовем ти:

Радуйся, Евфросиние, невесто Христова прекрасная.

Икос 1

Ангелов царица и мати Господа, провидящи равноангельное житие твое, услыша молитву святых твоих родителей, и разреши тобою неплодство их, трикратно тем явившись во сне, в знамение твоего избрания, блаженная. Мы же

такое о тебе Божие смотрение прославляюще,
взываем ти:

Радуйся, святой плоде, молитвами
неплодствовавших испрошенный.

Радуйся, честный даре, Приснодевою
безчадствовавшим дарованный.

Радуйся, чудным фимиамом, яко будущее
благоуханное селение духа, до зачатия
предзнаменованная.

Радуйся, в предосвященном молитвою и
Божиим благословением чреве зачатая.

Радуйся, по зачатию, яко чистая голубица, от
Пречистыя Девы даемою голубицею
предобразованная.

Радуйся, до рождения Царицею неба и земли
в служебный лик себе предизбранная.

Радуйся, еяже рождение Богородицею со
святыми Антонием и Феодосием яве
предвозвещено бысть.

Радуйся, ейже имя, яко имевшей быти
верною Богу рабою, Феодулия пронаречено
бысть.

Радуйся, рождением своим бывшее свыше
обетование оправдавшая.

Радуйся, по рождении абие великое свое предназначение проявившая.

Радуйся, еще в пеленах сущи, пост иноческий державшая.

Радуйся, от сосцу доилицы, егда тая мяса ядаше, николиже млека вкусити хотевшая.

Радуйся, Евфросиние, невесто Христова прекрасная.

Кондак 2

Видяще родители твои, яко услышана бысть молитва их о тебе, блаженная, и чудящися о явлениих Богоматере, во сне яко яве бывших, слагаху тая в сердце своем; велие же некое о тебе Божие смотрение в тех провидяще, радостно вопияху Богу: Аллилуиа.

Икос 2

Разумети хотя, по рождении твоём, Божие о тебе изволение, боголюбивая мати твоя, молящися усну, и виде себе во сне окриленну, в высоту парящу, и тя отроковицу Богу в руке вдающу; чесо ради Богу ты посвящающи по святом Крещении, вручи ты покрову и заступлению Царицы Небесныя. Мы же таковое

предустроение о тебе славяще, хвалебно
взываем ти:

Радуйся, по изволению Божию, в дар Богу от
рождения определенная.

Радуйся, изначала, яко в небесная парити
имущая, преуказанная.

Радуйся, от купели живаго со Христом
общения, взыскательницею быти
предъявленная.

Радуйся, во святом Крещении во Христа
облекшись, хриstopодражательницею быти
назначенная.

Радуйся, в троекратном во имя Пресвятыя
Троицы погружении, во свете лица Ея
пребывати начавшая.

Радуйся, в белы, во образ чистоты, ризы
одеянием в чин непорочных вступившая.

Радуйся, с возложением креста на выю,
благое иго Христово носить восприявшая.

Радуйся, с препоясанием чресл бодренною
подвижницею Христовою быти себе
показавшая.

Радуйся, с горящею при купели свещею, в
светлый лик благодатно освященных вчиненная.

Радуйся, в троекратном окрест купели хождении, яко обрученная Христу невеста ликовавшая.

Радуйся, в залог вечнаго с Небесным Женихом единения, святым миром запечатленная.

Радуйся, в осуждение всякия скверны греховныя, на всех чувствах знамение дара Духа Святаго приявшая.

Радуйся, Евфросиние, невесто Христова прекрасная.

Кондак 3

Силою свыше управляема, преуспевала еси возрастом и благодатию у Бога и человек; о чесом родители твои и южики радующеся, Богу, из уст младенец хвалу себе совершающему, зываху: Аллилуиа.

Икос 3

Имуще в памяти бывшыя о тебе знамения, и чудящеся необычному в отрочестве разуму твоему, родители твои разсудиша наипаче поучением божественных книг возгревати живуций в тебе дар благодатныя жизни, еже и соверши сам боголюбивый родитель твой святыи

благоверный князь Михаил. Хвалу воздающе
таковому о тебе родителей твоих мудрому
попечению, взываем ти:

Радуйся, Премудрости Божией пространное
приятельще.

Радуйся, младенцем открываемых таин
верное хранилище.

Радуйся, отроковице, млеком слова
животнаго воспитанная.

Радуйся, дево, чистыми токи небесных истин
напоенная.

Радуйся, теплотою учения родительскаго,
огнь любви к Господу в сердце твоём
возгревшая.

Радуйся, живыя стремления юности от
земных к небесным возведшая.

Радуйся, невесто, отцем по плоти в
уневещение Христу Господу руководствованная.

Радуйся, красото, паче всех красных мира,
красоты райския любити наученная.

Радуйся, розго Лозы Истинныя, Вертоград
Христов измлада украшавшая.

Радуйся, древо, от корене свята плоды благи рано приносить начавшее.

Радуйся, из детства чистотою небесным силам подобившаяся.

Радуйся, во всю жизнь осенением Приснодевы в непорочном девстве сохранившая.

Радуйся, Евфросиние, невесто Христова прекрасная.

Кондак 4

Бурю внутрь имеяху помышлений родители твои, егда приспе время преподавати ти внешняя учения, да не како теми охладится сердце твое к небесным; ведуще же страх Божий и святое житие богомудраго боярина Феодора, того призваша научити тя всякой внешней мудрости, Богу просвещающему умы воспевающе: Аллилуиа.

Икос 4

Слышащи преподаваемая тебе о мире Божиим учения, яко пчела, о внешних собирала еси сок, силою действовавшия в тебе благодати сладчайшаго паче меда Господа, в духовный сот превращала еси той, и вся искушающи, добрая

точию держала еси. Таковую мудрость твою хваляще, взываем ти:

Радуйся, от видимых тварей к невидимым Божиим возносившаяся.

Радуйся, от красот мира к краснейшему паче всех любовью возгаравшаяся.

Радуйся, созерцанием небес, славу Божию поведующих, к снисканию славы пренебесных воскрилявшаяся.

Радуйся, от изливания света солнечного на злыя и благия, богоподобной любви научавшаяся.

Радуйся, во образе солнца, всевидящее око Божие умным оком своим зрети учившаяся.

Радуйся, в различии славы солнца, луны и звезд, различие небесного по делом прославления познававшая.

Радуйся, от въздыханий суете неволею повинувшиися твари, блаженный о гресех плач восприявшая.

Радуйся, в тяготе вещей земных, тяготу грехов проразумевавшая.

Радуйся, стремлением огня горе, горняя мудроствовати научавшаяся.

Радуйся, прехождением образа мира сего, в любви к благому непреходящим утверждавшаяся.

Радуйся, в строении вещей земных, тайны устройства спасения прозревавшая.

Радуйся, яко злато огнем искушаемое, очистительный искушений огонь радостно терпети предназначившая.

Радуйся, Евфросиние, невесто Христова прекрасная.

Кондак 5

Боготечной звезде, волхвов к Солнцу Правды приведшей иногда, подобящися в дому и княжении родителей твоих, на путь спасения приводила еси всех, на святое житие твое взиравших, и словес данная тебе премудрости слушавших, иже, тобою просвещаемы, Богу ты умудряющему радостно взываху: Аллилуиа.

Икос 5

Видеша ты умом и красотою паче всех дочерей высокородных славну сынове княжестии, и молением стужиша родителем твоим, пояти ты ищуще; но не получиша желаемого, Богу лучшее нечто о тебе устрояющу.

Мы же о тебе путем Божиим чудящися, взываем ти:

Радуйся, красотою души, паче неже лепотою тела, всех другинь превосходившая.

Радуйся, святостию жития, паче неже благородством рода, прославившаяся.

Радуйся, славных и прекрасных искателей твоих ни во что же вменившая.

Радуйся, краснейшаго паче всех человек всем сердцем взыскавшая.

Радуйся, к единому жениху Христу тайным сердца желанием влекомая.

Радуйся, Тому, Егоже возлюби душа твоя, невидимым Божиим промыслением блюдомая.

Радуйся, единого Господа невозвратным помыслом себе избравшая.

Радуйся, умом и сердцем в Нем исчезающая.

Радуйся, именем Иисуса, паче мира благоуханна, услаждавшаяся.

Радуйся, теплотою любви Христовы, паче солнца светозарна, согревавшаяся.

Радуйся, во еже духовне Христу обручиться достойно себе уготовлявшая.

Радуйся, боголюбезным добронравием,
внутри и вне, богато себе украсити
ревновавшая.

Радуйся, Евфросиние, невесто Христова
прекрасная.

Кондак 6

Провозвестницы бывше божественнаго о тебе
промышления родители твои, тайным Божиим
велением влекоми, соизволиша на моление
Мины, князя суздальскаго, паче других
искателей твоих и родом и делом славна, и на
Бога все упование возложше, на брак тя с ним
благословиша, воспевающе вся премудре
строющему: Аллилуиа.

Икос 6

Возсия свет утешения в души твоей, егда в
слезных молитвах поведавши скорби сердца
твоего владычице Богородице, о внезапном
устроении жизни твоей не по сердцу твоему,
услышала еси радостный Тоя глас, волю
родителей исполнити тебе повелевавший, и не
разоритися обетом и желанием твоим
обещавший. Таковое Матери Божией к тебе
благоволение славяще, ублажаем тя, вопиюще:

Радуйся, невесто, дивными путями во объятия Христова наставленная.

Радуйся, дево, матерним Приснодевы попечением руководствованная.

Радуйся, теплым воли родителей повиновением связуемая.

Радуйся, и неизменным желанием девства снедаемая.

Радуйся, таковое в сердце распятие ради Господа претерпевшая.

Радуйся, преданностию воли Божией, яко на кресте себе в жертву Богу принесшая.

Радуйся, любовь ко Господу с покорностию родителем сочетавшая.

Радуйся, уповательным послушанием и честь браку воздавшая, и честнейшее брака девство сохраняющая.

Радуйся, на брак ити напутствованная, и в безбрачии пребыти несомненно чаявшая.

Радуйся, на пути во мрак сокровенных о тебе путей Божиих с трепетом воззревавшая.

Радуйся, в приражении недоумений о будущем, на камени упования крепко утвердившаяся.

Радуйся, в данном тебе Богородицею обетовании, яко на лоне матернем упокоевавшаяся.

Радуйся, Евфросиние, невесто Христова прекрасная.

Кондак 7

Хотящу тако Божию вседержительству, князь Мина, еще не доспевшей тебе града Суждаля, предаде дух свой в руке Божии. Ты же от всяких уз земных свободу улучивши, радостно воспела еси славу Богу: Аллилуиа.

Икос 7

Новую показала еси добродетель, блаженная, егда твердое восприяла еси намерение не возвращатися в дом родителей, вселитися же во граде Суждале, во обители положения риз Божия Матере; идеже сокровища своя бедным иждивши, ангельский образ прияла еси. Таковое твое мудрое о себе и спасительно бывшее нам изволение славяще, взываем ти:

Радуйся, во уповании своем не
постыжденная.

Радуйся, получением желанья своего
обрадованная.

Радуйся, от треволнений мира в небурном
пристанищи укрывшаяся.

Радуйся, вожденному тебе лику дев
радостно сопричетшаяся.

Радуйся, вся утехи земныя во уметы
вменившая.

Радуйся, сокровища вена твоего руками
нищих в небесныя сокровищницы
предпославшая.

Радуйся, любви ради ко Христу в нищету Его
облекшаяся.

Радуйся, всю славу мира иноческим
смирением поправшая.

Радуйся, в пострижении иноческом желанием
строгаго постничества горевшая.

Радуйся, с принятием иноческаго образа
духовное всеоружие восприявшая.

Радуйся, по оставлении мира о едином на
потребу точию помышлявшая.

Радуйся, по вселении во обитель черноризиц, духом в общении ангел и святых жити наченшая.

Радуйся, Евфросиние, невесто Христова прекрасная.

Кондак 8

Странно житие восприяла еси во обители, преподобная, смиривши себе паче всех; княжна бо сущи, черноризицам проста рода Христа ради служила еси, поношением Христовым честь рода своего возвеличивши, Богу дивныя подвиги твоя прославльшу, Емуже вопием: Аллилуиа.

Икос 8

Вся в вышних была еси духом, преподобная, и божественною укрепляема благодатию, во всех добродетелех преуспевала еси, образ совершеннаго иноческаго жития всем, сподвизавшымся ти, подавающи. Темже ублажаем тя, всехвальная:

Радуйся, подвигом добрым подвизавшаяся.

Радуйся, чтение свое добре совершившая.

Радуйся, страхом Божиим всякое нечистое желание побеждавшая.

Радуйся, памятью о смерти всякое суетное попечение отгонявшая.

Радуйся, пощени и бдении плоть свою смирявшая.

Радуйся, умным деланием душу свою выну горе восторгавшая.

Радуйся, всегдашним уединением от соблазнов мира чувства своя соблюдавшая.

Радуйся, бодренным трезвением от злых помыслов сердце свое охранявшая.

Радуйся, в молитвах неусыпная, и в чтении Божественных книг ненасытимая.

Радуйся, на всякое послушание скорая, на исполнение же воли своей косная.

Радуйся, терпения, кротости и любви зеркало.

Радуйся, сердечнаго сокрушения, всегдашняго плача и покаяния правило.

Радуйся, Евфросиние, невесто Христова прекрасная.

Кондак 9

Ангелоподобным житием просиявши, жезл
настоятельства прияла еси, блаженная, и добре
правлящи обитель сию молитвою и примером
жизни своея, словом научения и устройением
чина иноческаго, души тебе вверенныя к Богу
приводила еси, научаючи вся пети Ему:
Аллилуиа.

Икос 9

Витийствующий язык не может изглаголати
мудрости твоея начальственныя, егда дев от
вдовиц отделила еси, да не како от взора и
речей помыслы о сластех житейских приемше,
осквернятся теми в сердце своем, и в добром
течении своем запяты будут. Чесо ради дань
хвалы тебе приносяще, взываем:

Радуйся, душ боголюбивых мудрая
руководительнице.

Радуйся, невест Христовых неусыпная
блюстительнице.

Радуйся, в управлении своем простоту с
мудростию соединившая.

Радуйся, в начальствовании своем
снисхождение с взыскательностью сочетавшая.

Радуйся, строгость власти материнскою любовью умерявшая.

Радуйся, материнскую любовь строгостию власти отрезвлявшая.

Радуйся, мудрыми наставлении добрых в добре утверждавшая.

Радуйся, и единым взором неисправных к исправности подвизавшая.

Радуйся, крепкою молитвою невидимыя стрелы вражеския от обители отражавшая.

Радуйся, мудрыми порядками внешния соблазны мира от сестр отвращавшая.

Радуйся, теплыми попечении земную обитель в рай претворившая.

Радуйся, устройением истиннаго иночества, вход в Царство Небесное всем угладившая.

Радуйся, Евфросиние, невесто Христова прекрасная.

Кондак 10

Спасти хотя тобою души многих, милосердый Господь многими дары обогати тя, преподобная, чудотворения и пророчества, прозорливости же и слова помазаннаго, имиже прославляющи

ущедрившаго тя Господа, подвигла еси пети Ему всех: Аллилуиа.

Икос 10

Стена была еси обители твоей, егда от неистовства Батыева молитвами твоими сохранила еси ю невредиму. Таковое дивное твое заступление поминающе, взываем ти:

Радуйся, трудолюбным Богу служением дерзновение к Нему стяжавшая.

Радуйся, совершенным страстей очищением Божие благоволение к себе привлекая.

Радуйся, благодатей богоизбранный сосуде.

Радуйся, духа благодвижный органе.

Радуйся, алчущия ведения души манною Божественных истин питавшая.

Радуйся, благочестивых чувства благоуханием обетований услаждавшая.

Радуйся, недуги душевныя словом действенным врачевавшая.

Радуйся, болезни телесныя именем Иисусовым исцелявшая.

Радуйся, будущая яко настоящая, провидевшая.

Радуйся, дальняя, яко близ сущая зревшая.

Радуйся, помышления сердечная Духом Божиим прозревавшая.

Радуйся, потаенныя страсти Божиим озарением обличавшая.

Радуйся, Евфросиние, невесто Христова прекрасная.

Кондак 11

Пение всякое превосходят небесная утешения, богоблаженная, имиже труды и подвиги твоя увенча Христос Господь в небесных обителях, идеже водворяющися со ангелы и всеми святыми непрестанно воспеваеши Ему: Аллилуиа.

Икос 11

Светоподателен светильник всякаго утешения была еси, по преставлении твоём, преподобная мати; яви бо тя Христос Господь молитвенницу и ходатаицу всем, с верою к тебе прибежавшим. Мы же твоим заступлением ограждаеми, зовем ти:

Радуйся, по преставлении своём Господом Неба и земли милостивно приятая.

Радуйся, по отшествии от земных в Небесных обителях водворенная.

Радуйся, венцем славы за смирение венчанная.

Радуйся, на престоле царствия за победы над страстями посажденная.

Радуйся, от манны сокровенная за сокрушение и слезы услаждаемая.

Радуйся, от древа животнаго за многия лишения питаемая.

Радуйся, с Царицею Небесною у Престола Царя царей предстоящая.

Радуйся, с ангелы и всеми святыми заступлением своим нас приосеняющая.

Радуйся, матери, и с Неба любящих тя теплотою любви согревати не преставшая.

Радуйся, и среди небесных утешений земных чад своих не забывшая.

Радуйся, ходатаице усердная, прибегающих к тебе не посрамляющая.

Радуйся, молитвеннице крепкая, смиренных к тебе молитв не презирающая.

Радуйся, Евфросиние, невесто Христова прекрасная.

Кондак 12

Благодать на благодать бысть нам открытие нетленных мощей твоих, преподобная, в нихже источник всякаго утешения стяжавше, величаем возвеличившаго тя Христа Господа, благодарно поюще Ему: Аллилуиа.

Икос 12

Поюще дивнаго во святых своих Господа, тя, яко избранную невесту свою, славою и честью венчавша, и твое милостивое и скорое во всех нуждах наших заступление и всепоможение прославляюще, благодарно зовем ти:

Радуйся, всеусердная наша предстательнице.

Радуйся, неотступная наша хранительнице.

Радуйся, обители сея твердое ограждение.

Радуйся, града нашего верное защищение.

Радуйся, скорбящим отрадо и утешение.

Радуйся, обидимым прибежище и заступление.

Радуйся, болящих неоскудное врачевание.

Радуйся, бедствующим благонадежное избавление.

Радуйся, благочестивым царем нашим скорая помощнице.

Радуйся, христоробивому воинству необоримая споборнице.

Радуйся, сене, от праведнаго гнева Божия нас укрывающая.

Радуйся, роса, огонь всяких скорбей и страстей прохлаждающая.

Радуйся, Евфросиние, невесто Христова прекрасная.

Кондак 13

О преславная мати, прими малое сие тебе наше приношение, и твоим теплым у Престола Божия ходатайством, избави нас от враг видимых и невидимых, от всяких бед и скорбей, от всякаго губительства и вечныя смерти, да с тобою и всеми святыми, в Царствии Небесном, сподобимся со всеми пети Богу Спасителю нашему: Аллилуиа.

Кондак сей глаголи трижды, таже Икос 1 и Кондак 1.

Молитва

О преславная мати, скорая наша помощнице и заступнице, и неусыпная о нас молитвеннице! Предстояще раце мощей твоих, и ты яко живу суцу зряще, припадающе молимся тебе: приими прошения наша, и принеси я ко Престолу милосердаго Отца Небеснаго, яко дерзновение к Нему имущая, испроси притекающим к тебе и всем православным христианом вечное спасение и временное благоденствие, на вся благая дела и начинания наша щедрое благословение, от всяких бед и скорбей скорое избавление. Ей, чадолюбивая мати наша, тебе предстоящей Престолу Божию, ведомы нужды наша духовныя и житейския, призри на ны матерним оком, и твоими молитвами отврати от нас колебание всяким ветром учения, злых и богопротивных обычаев умножение; утверди же во всех веры согласное ведение, взаимную любовь и единомыслие, да всем и словесы, и писании, и делом, славится среди нас всесвятое имя Отца и Сына и Святаго Духа, Единого Бога, в Троице покланяемаго, Емуже честь и слава, во веки веков. Аминь.